

Inatsisartut Ombudsmandiata 2024-mut ukiumoortumik nalunaarutaata Inatsisartunit tusaatissatut tiguneqarnissaanik Inatsisartut aalajangiiffigisassaattut siunnersuut
(Inatsisinut Ataatsimiititaliaq)

Akissuteqaat

(Naalakkersuisut Siulittaasuat)

Siullermeerneqarnera

Aallaqqaasiullugu Inatsisartut Ombudsmandiata ukioq 2024-mut ukiumoortumik nalunaarutaa pillugu qutsaviginiarpara.

Pisortani ingerlatsinermi sulī unammilligassaqqartoq nalunaarummi erseqqissumik takuneqarsinnaavoq innuttaasullu inatsisitigut illersugaanissaat sullinneqarluarnissaallu peqqissaarunnissaa qulakkeerneqassappat ataavartumik ingerlatsinissaa kiisalu pisortat ingerlataqarfiini ilisimasanik, isumalluutini suleriutsinillu pitsanngorsaajuarnissaaq pisariaqqartoq.

Naalakkersuisut Ombudsmandip suliassamik suliassaqqartarnerup pingaartumik kommunini isumaginninnikkut ingerlatsinermi amerlanertigut innuttaasut inuuniarnermikkut unammillernartumik inissisimaffiini, sulī unammillernartuuneranik erseqqissaanera isiginiarpaat. Naalakkersuisunit piffissaliussanik allattuisussaataitanerullu malinneqarnissaanik, taamaasilluni allaffissornerup uppersaatinillu nalunaarsuineri eqqortumik ingerlatsinissaa isumaqatigineqarpoq. Allattuisussaataitanerup innuttaasut inatsisitigut illersorneqarnissaanik allaffissornikkullu suliagarnermi kiisalu pitsaassutsimik qulakkeerrinninnissamut tunngaviuvoq. Allattuisussaataitanermik malinninnermittaaq nakkutilliisutut naammagittaalliuteqarsinnaanissamillu oqartussaaffeqartut suliassaminnik naammassinnissinnaanerannik pingaaruteqarluinnarpoq.

Taamaattumik Ombudsmandip pisortani ingerlatsineq pillugu malittarisassarsiornikuunera pisortallu ingerlatsinerini inatsit pillugu sammisat pingaarnerit pillugit ilitsersuusiornini aallartinnikuummagu iluaqutaassaaq. Naalakkersuisunit ilitsersuusiorneq taparserneqarpoq kommuninilu qitiusumilu allaffeqarfinni kiisalu ilinniartfinni ilinniaqqinnernilu sammineqarnissaa sakkortuumik kaammattuutigineqarpoq.

Naalakkersuisunit Ombudsmandip sulisussarsiornarup sulisunillu tigungminniinnarnissap ataavartumik ajornartorsiutigineqarneranik oqariartuutaa isumaqatigineqarpoq. Suliassat ingerlanneqarneranni kukkuluttornerit qularnerillu pilersarput sullissisunik misilittagalinnik amigaateqarneq taarserarnerujussuillu peqqutaallutik. Taamaattumik Naalakkersuisunit Iisimatusarfik qanimut suleqatigineratigut piginnaanngorsaqqinnerni, ilinniaqqinnerni

sulisussarsionernilu pitsanngorsaanerit anguniarneqartuarput. Suliffeqarnerli allanngorartuaannarpoq, ukiunilu kingullerni unammillernartoqareerluni 2025-mi allaffissornikkut sulisussarsiorneq pitsanngoriartorpoq. Naalakkersuisunit ineriartorneq tamanna sulisoqarnikkut isumalluutitsinnik atorluaaniarnikkut aaqqissuusseqqinnikkut tapersersimavarput.

Ombudsmandimit oqartussanit piffissat ilaanni innuttaasunit saaffiginninnerit naammaginangitsumik nakkarsaarpaluttumilluunniit isumagineqartarnerisa takutippaat innuttaasut oqartussallu akornanni attaveqaqatigiinnerup ataqqinnippalaartumik ammasumillu oqaloqatiginninnikkut ingerlanneqarnissaanik pingaartitsinitta erseqqissartuarnissaa. Naalakkersuinit pisortani atorfillit tamarmik innuttaasunik saaffiginninnerit allanik akuliussuinani sullissinissamut sakkussanik peqarnissaat kiisalu oqartussa qarfinni erseqqarissumik tunngaviliisinnaanissaat pingaartinneqarpoq. Ukiuni kingullerni Naalakkersuiso qarfinni Qitiusumik Allatto qarfimmi atorfilittat sulisut tunngavissiaanik pisortallu tunngavissiaanik suliaqarnikkut pisussaaffii oqaasertalersorneqarput. Tunngavissiornermi misilittakkatta kommuninit soqutigineqassappata avitseqatigiissutigisinnaavagut.

Ataatsimut isigalugu Ombudmandip pitsanngorsaasoqartariaqarneranik ineriartornissamullu piumassuseqartoqarluarneranik inerniliinera Naalakkersuisunit akuersarneqarpoq. Suliniutit allartinneqareersimasut ilaatigut digitalinngorsaaneq, ilitersuussilluarneruneq ingerlatsilluarnissallu ukkatarineqarnissaata ingerlatiinnarnissaa pitsanngorsartuarnissaalu. Suliniutit taakkua sulisussarsionernik sulisoqaannarnissanillu suliniuteqarnermik, ilinniaqqinnernik aqutsisullu atorfilittatut pisussaafimminnik ukkassinerinik kiisalu innuttaasumut maligassiuilluni pissuserissaarnermik tapitalerneqassapput.

Naalakkersuisut taamatut oqaaseqarlutik Inatsisartut Ombudsmandiata 2024-imut nalunaarusiaata Inatsisartunit tusaatissatut tiguneqarnissaa taperserpaat.